

四庫全書

集部

欽定四庫全書

集部

元文類卷三十九

詳校官通政使_臣夢吉

助教_臣常循覆勘

總校官庶吉士_臣朱鈐

校對官中書_臣嵇承志

謄錄監生_臣李維瀛

欽定四庫全書

元文類卷二十八

元 蘇天爵 編

說

唯諾說

劉 因

唯恭于諾何也曰各有所施也呼之則其音必內故唯以趨赴之若趨物而奉之也命之則其聲必外故諾以承受之若與物而受之也夫其所施則文理從而亂矣豈但是乎凡物無無對者無無陰陽者而聲亦然其意

象之清濁闔闢亦莫不合也姑以進退存亡吉凶消長
體之則可見矣此天機之所發而禮樂之所由生雖天
地亦不知其所以然者豈但人乎物之聲亦然豈但聲
乎凡形色氣味皆然也而況古今之時變事物之倫理
聖人何嘗加損于其間哉惟妙此理而宰此事者心焉
而已矣必盡夫心也然後聲為律而身為度苟為不然
幾何其不為無適非道之道作用是性之性也

權說

何榮祖

或問權之為說漢儒解之于前宋儒非之于後不識權者果何物也愚曰權亦事之宜也然則權與義同乎曰不同請問其說曰有常之宜曰義臨時之宜曰權問者未達曰權之說如此不有害于道乎曰否孟子嘗言之矣權正謂害道者說也竊實思之盈天地之間往者過來者復裁制萬事變通無窮者惟其義而已蓋仁者義之愛也智者義之辨也禮者義之儀也中者義之則也信者義之實也雖然人之情萬殊事之出萬變或愛有

不可施智有不可用禮有不可執中有不可定信有不可必是皆孟子所謂害道者也聖人知其然故曰可與共學未可與適道可與適道未可與立可與立未可與權夫權者聖人憂道之深謀處變之大用也如可乎不可乎不可此義也或可之中有不可而不可之中有可此權也權與義無非道也然君子之用心所當日進者學也深造者道也謹守者義也不可預知者權也愚故曰有常之宜曰義臨時之宜曰權

無極而太極說

吳 澂

太極者何也曰道也道而稱之曰太極何也曰假借之辭也道不可名也故假借可名之器以名之也以其天地萬物之所共由也則名之曰道道者大路也以其條派縷脉之微密也則名之曰理理者玉膚也皆假借而為稱者也貞實無妄曰誠全體自然曰天主宰造化曰帝妙用不測曰神付與萬物曰命物受以生曰性得此性曰德具于心曰仁天地萬物之統會曰太極道也理

也誠也天也帝也神也命也性也德也仁也太極也名
雖不同其實一也極屋棟之名也屋之脊標曰棟就一
屋而言惟脊標至高至上無以加之故曰極而凡物之
統會處因假借其義而名為極焉辰極皇極之類是也
道者天地萬物之統會至尊至貴無以加者故亦假借
屋棟之名而稱之曰極也然則何以謂之太曰太之為
言大之至甚也夫屋極者屋棟為一屋之極而已辰極
者北辰為天體之極而已皇極者人君一身為天下衆

人之極而已以至設官為民之極京師為四方之極皆不過指一物一處而言也道者天地萬物之極也雖假借極之一字強為稱號而曾何足以擬議其髣髴哉故又盡其辭而曰太極者蓋曰此極乃甚大之極非若一物一處之極也然彼一物一處之極極之小者耳此天地萬物之極極之至大者也故曰太極邵子曰道為太極太祖問曰何物最大荅者曰道理最大其斯之謂歟然則何以謂之無極曰道為天地萬物之體而無體謂

之太極而非有一物在一處可得而指名之也故曰無極易曰神無方易無體詩曰上天之載無聲無臭其斯之謂歟然則無極而太極何也曰屋極辰極皇極民極四方之極凡物之號為極者皆有可得而指名者也是則有所謂極也道也者無形無象無可執著雖稱曰極而無所謂極也雖無所謂極而實為天地萬物之極故曰無極而太極

致慤亭說

吳 澂

墓焉而體魄安廟焉而神魂聚人子之所以孝于其親者
二端而已何也人之生也神與體合而其死也神與體離
以其離而二也故于其可見而疑于無知者謹藏之而不
忍見其亡于其不可見而疑于有知者勤求之而如或見
其存藏之而不忍見其亡葬之道也求之而如或見其存
祭之道也葬之日送形而往于墓葬之後迎精而返于家
方其迎精而返于家也一旬之內五祭而不為數惟恐其
未聚也及其除喪而遷于廟也一歲之內四祭而不敢疏

惟恐其或散也家有廟廟有主祭之禮于家不于墓也墓也者親之體魄所藏而神魂之聚不在是以時展省焉展省之禮非祭也近代所謂祭者或隆于墟墓而略于家夫伊川野祭古所深慨習俗之由來漸矣不有禮以稽其弊則雖豪傑之士亦且因仍而莫怪予嘗適野見車馬蔽道士女盈盈于墟墓之間少長咸集攀號悲泣彷彿初喪之哀亦未嘗不嘉其孝誠之篤而亦不能不歎夫古禮之泯也在乎梁潤之篤于親者作亭墓間朝

之間人為扁曰致慙或者又引祭義以發明之俾梁氏
孝思悠悠不能已其言豈無助哉雖然祭義所云皆廟
祭之事非可施之墟墓間也梁之子宜國子伴讀復請
于予予以古人之正禮告禮有其義人之報本反始求
之于有而不求之于無非達鬼神之情狀者未易語此
京兆蕭君曰為祠堂于所居揭斯扁于齋室庶乎其可
斯言也不亦善于禮矣夫

李侯諸子名字說

虞集

河東李侯有子若姪七人皆長矣一日悉命以名而字之曰思慎字克孝者侯之兄子也曰思謹字克忠曰思善字克敏者侯仲弟之子也曰思德字克峻者侯之子也曰思貞字克固曰思信字克誠曰思勤字克敏者侯季弟之子也其取諸字義者蓋因其性之所近而揀其習之所偏以示勉勵警戒之意云于是以告虞集曰願有以申其說使昭然知所以為教者永久不忘也集曰古者筮賓而冠既冠而字則辭而祝焉禮也而集不令

不足為之辭不敢當也且知子莫若父其所以命子者
宜必深切而至當矣為子者受言藏之而用力焉革其
所未善勉其所未能克其所未至則一言也終身行之
而有餘矣不然則雖使儒生數十更咻而迭喻之亦何
益哉雖然集不敏忝以誦道古訓為職事其敢固辭乎
乃祝之曰勗爾思慎必戒必懼以事爾親爾不克慎不
孝之名將在爾身可不慎哉勗爾思謹必競其業以事
于君爾不克謹不忠之名將累爾親可不謹哉勗爾思

善善固爾有爾不加敏善曷能至勗爾思德德稟自天
既峻且明勿虧其全貞德之固信德之實勉哉爾勤三
思勿失既祝已又語之曰謹慎勤以行言也善與德以
得諸天而有諸已者為言也貞信以德中之一事而為
言也大抵皆文之美者也文之美者速數之不能既其
類七言者又安足以盡之要其歸在于能思而已箕子
曰思曰睿睿作聖孟子曰思則得之不思則不得也至
哉思乎一有不思則慎謹者肆而勉者惰矣善不明而

德不立矣貞者不貞而信者不信矣思之哉思之哉苟
思之則忠孝而下凡百行之美無不能矣二三子思之
哉終日不食以思終夜不寢以思則父命之嚴必能深
求其意而有立于成矣然則吾見李氏之子孫福祿方
來而未艾也二三子勉之哉

蘇君字說

虞 槃

趙郡蘇君間謂槃曰吾名天爵字伯修願子為我著其
說俾因是有省蓋庶幾朋友之義也槃聞之曰大矣哉

子之所以為名也槃嘗惕然思俛然學于是矣昔者孔子曰修己以敬子思子曰修道之謂教何謂己目之視耳之聽心之思也何謂道仁之于父子義之于君臣禮之節文智之辨別也修之如何視極其明而無所不見也聽極其聰而無所不聞也思極其睿而無所往而不通也是之謂敬由其仁而親疎之殺無不愛由其義而貴賤之等無不宜由其節文而委曲無不得其當由其辨別而是非無不致其察是之謂教嗟夫人之所以為

人者具于吾身而耳目之用著焉接于吾身而君臣父子之理交焉舍是其無以致其修矣然而聰明之所運用仁義之所擴充者尤不可以不博也動焉而念慮之詳事為之著也感焉而天地鬼神之變鳥獸草木之宜也苟皆有以窮其理而致其知則學愈博守愈約修之道不已至乎或曰罷物必弊也而後修治之文采必晦也而後修明之若人之所以為人其體何具何俟于修嗚呼為是說者亦將清淨寂滅之歸而姑為是無證之

言也卞之玉也棠谿之金也非素為器也脩其職而器成焉和之弓也垂之竹矢也非素能巧也脩其業而巧著焉故琢也範也弦也剡也而工化其質瑚璉也戈矛也弓與矢也而物致其用由是言之學者敏于修而已敏于修則體無不具而用無不周其亦有外此而可以言學者乎孟子曰聖人百世之師也伯夷柳下惠是也伯夷柳下惠無以異于衆人也而可以為百世之師者何哉修其身而已耳書曰慎厥身修思永則願與吾子

共勉之也

題跋

跋金國名公書

元好問

任南麓書如老法家斷獄網密文峻不免嚴而少恩使
之治京兆亦當不在趙張三王之下黃山書如深山道
人草衣木食不可以衣冠禮樂束縛遠而望之知其為
風塵物表黃華書如東晉名流往往以風流自命如封
胡羯末猶有醞籍可觀閑閑公書如本色頭陀學至無

學橫說豎說無非般若百年以來以書名者多矣宇文
太學升通王禮部無競蔡丞相伯堅父子吳深州彥高
高待制子文耳目所接見行輩相後先為一時任高麓
趙黃山趙禮部龐都運才卿史集賢季宏王都勾清卿
許司諫道真為一時若党承旨正書八分閑閑以為百
年以來無與比者篆字則李陽冰以後一人郭忠恕徐
常侍不論今卷中諸公書皆備而行溪獨見遺正如鄴
中賓客應劉徐阮皆天下之選使坐無陳思王則亦不

得不為西園清夜惜也

跋趙太常擬試賦藁後

楊 與

金大定中君臣上下以淳德相尚學校自京師達于郡國專事經術教養故士大夫之學少華而多實明昌以後朝野無事侈靡成風喜歌詩故士大夫之學多華而少實上病其然也當泰和丙寅春二月二十五日萬寧宮試貢士總兩科無慮千三百輩上躬命賦題曰日合天統侍臣初甚難之而太常卿北京趙公適克御前讀

卷官獨以謂不難即日奏賦議乃定既而中選者纔二十有八人僕時甫冠獲試廷下而席屋偶居前列朝隙聞異香出殿櫺間一紫衣顧予起問題之難易及名氏里貫年齒而去少顧復相慶曰適駕至矣薄暮出宮傳以為希遇嘗退而志之後四十五年僕以河南漕長告老子燕過太常之孫承祖家得所擬賦感念存沒不能不惘然為叙其末并以舊詩歸之所謂月澹長楊曉色清天題飛下寂無聲南山霧豹文章在北海雲鵬羽翼

成玉檻玲瓏紅露重金爐縹緲翠烟輕誰言半夜曾前
席白日君王問賈生者是詩少作也無可取以其紀一
時之事庶附趙氏家傳或見于後世云

題中州詩集後

家鉉翁

世之治也三光五岳之氣鍾而為一代人物其生乎中
原奮乎齊魯汴洛之間者固中州人物也亦有生于四
方奮于遐外而道學文章為世所宗功化德業被于海
內雖謂之中州人物可也蓋天為斯世而生斯人氣化

之全光岳之英實萃于一方豈得而私其有哉迨夫
宇縣中分南北異壤而論道統之所自來必曰宗于某
言文脉之所從出必曰派于某又莫非盛時人物範模
憲度之所流行故壤地有南北而人物無南北道統文
脉無南北雖在萬里外皆中州也況于在中州者乎余
嘗有見于此自燕徙而河間稍得與儒冠縉紳遊暇日
獲觀遺山元子所裒中州集者百年而上南北名人節
士鉅儒達官所為詩與其平生出處大致皆采錄不遺

而宋建炎以後銜命見留與留而得歸者其所為詩與其大節始終亦復見紀凡十卷總而名之曰中州集盛矣哉元子之為此名也廣矣哉元子之用心也夫生于中原而視九州四海之人物猶吾同國之人生于數百年後而視數十百年前人物猶吾生並世之人片言一善殘編佚詩搜訪惟恐其不能盡余于是知元子胸懷卓犖過人遠甚彼小智自私者同室藩籬一家爾汝視元子之宏度偉識溟滓下風矣嗚呼若元子者可謂

天下士矣數百載之下必有謂予言為然者

跋崔清獻公洪忠文公帖

牟巖

宋嘉定中清獻崔公以次對帥蜀其後遂制置西事賓客從者忠文洪公實顓牋翰崔公清規重德洪公雄文直道參會一時蜀人紀之以為殆過石湖放翁也崔公出蜀歸卧五年杜門謝病而洪公以考功郎論巴陵事得罪擯天目山下端平改紀崔公遂相白麻一出天下傾想風采公力辭不拜御筆手詔旁午于道朝臣中使

守門趣發公訖不起以至謝事是時亦起洪公為臺諫
給舍為兩制論駁不少貶顧以病不大用賓主相為始
終蓋如此至正丙申得觀兩帖于唐思善家為之感歎
崔帖後有中書省印乃程滄洲家舊物云

書張侯言行錄後

圖克坦公履

嘗讀莊周書見其為養虎之說曰善養虎者當時其飢
飽而達其怒心竊謂莊周出世之士當治其浮游猖狂
之說乃引類取譬得用權之法余因周之說而且有所

感焉士之出身以仕于時者天豈不欲得仁人君子與之共圖回天下之事哉不幸而當世道失平之日其所遭際多强悍勃惡剛獷暴露之人猶之虎也苟一旦爭是非于庭辯之際是以生物全物與之彼將不勝其怒甘心以求逞則決裂之禍至矣其于國計何如耶僕因閱澹游王公所狀張君行事見其待東帥未嘗逆其盛氣得與之相終始而無敗事之失巧乎道術之士其知莊周養虎之說而達其怒心者乎士生不辰有能高蹈

遠引如夷齊魯連子則無說矣審不能為是舉當以張侯行事為處身之法其無調虎以取反噬之禍撓敗國計貽世人嗤笑

記太極圖後

劉因

太極圖朱子發謂周子得于穆伯長而胡仁仲因之遂亦謂穆特周子學之一師陸子靜因之遂亦以朱錄為有考而潘誌之不足據也蓋胡氏兄弟于希夷不能無少譏議是以謂周子為非止為种穆之學者陸氏兄弟

以希夷為老氏之學而欲其當謬加無極之責而有所顧藉于周子也然其實則穆死于明道元年而周子時年十四矣是朱氏胡氏陸氏不惟不改乎潘誌之過而又不攷乎此之過也然始也朱子見潘誌知圖為周子所自作而非有所受于人也于乾道己丑己叙于通書之後矣後八年記書堂則亦曰不由師傳默契道體實天之所畀也又十年因見張詠事有陰陽之語與圖說意頗合以詠學于希夷者也故謂是說之傳固有端緒

至于先生然後得之于心無所不貫于是始為此圖以發其祕爾又八年而為圖書法釋則復云莫或知其師傳之所自蓋前之為說者乃復疑而未定矣豈亦不攷乎此故其為說之不決于一也而或又謂周子與胡宿邵古同事潤州一浮屠而傳其易書此蓋與謂邵氏之學因其母舊為某氏妾藏其亡夫遺書以歸邵氏者同為淺薄不根之說也然而周子邵子之學先天太極之圖雖不敢必其所傳之出于一而其理則未嘗不一而

其理之出于河圖者則又未嘗不一也夫河圖之中宮則先天圖之所謂無極所謂太極所謂道與心者也先天圖之所謂無極所謂太極所謂道與心者即太極圖之所謂無極而太極所謂太極本無極所謂人之所以最靈者也河圖之東北陽之二生數統夫陰之二成數則先天圖之左方震一離兌二乾三者即太極圖之左方震一離兌二乾三者即太極圖之左方陽動者也其兌離之為陽中之陰即陽動中之為陰靜之根者也河

圖之西南陰之二生數統夫陽之二成數則先天圖之
右方巽四坎艮五坤六者也先天之右方巽四坎艮五
坤六者即太極圖之右方陰靜者也其坎艮之為陰中
之陽者即陰靜中之為陽動之根者也河圖之奇偶即
先天太極圖之所謂陰陽而凡陽皆乾凡陰皆坤也河
圖先天太極圖之左方皆離之象也右方皆坎之象也
是以河圖水火居南北之極先天圖坎離列左右之門
太極圖陽變陰合而即生水火也至元丙子八月望日

靜修新齋記

跋懷素藏貞律公二帖後

劉因

顏魯公自其九世祖騰之至公以能書名天下者凡十人而顏類不與焉其淵源已如此而其父已傳法于殷仲容而公又會意于張長史今見懷素此帖所云則知公之講習于師友者又如此嗚呼書一藝也必欲其精而猶如是矧其大者乎帖後有文潞公呂汲公趙懿簡劉忠肅諸公元祐四年跋語是年潞公以元老平章軍

國事方辭去不得而汲公為宰相懿簡為樞密忠肅公
為御史吁亦盛矣哉後游師雄刻此帖于長安則八年
九月也宣仁后實以是月崩而明年已非元祐矣宋之
治亂于此焉分又所以發予之歎也此雖一帖而有可
鑒者二故併書于後以傳覽者云至元丁丑七月己亥
容城劉因書

題党懷英八分書

胡祇遹

文章與時高下唐不如漢漢不如三代党竹溪在金朝

為第一流方之梁鵠蔡邕鍾繇一何遼哉僅能得韓擇
木之髣髴耳

元文類卷三十八

欽定四庫全書

元文類卷三十九

元 蘇天爵 編

題跋

書李伯時九歌圖後

吳 澂

九歌者何楚巫之歌也巫以歌舞事神手舞而口歌之
九歌之目天神五人鬼二地示一俱非楚國所當祀而
況民間乎物魅一又非人類所與接也然則楚巫事之而
有歌何耶古荆蠻之地中國政化之所不及先王禮教

之所不行其俗好鬼而多淫祀所由來遠矣三閭大夫
不獲乎上去國而南覩淫祀之非禮聆巫歌之不辭憤
悶中託以抒情擬作九篇既有以易其荒淫媒慢之言
又借以寄吾忠愛繾綣之意後世文人之擬琴操擬樂
府肇于此琴操樂府古有其名亦有其辭而其辭鄙淺
初蓋出于賤工野人之口君子不道也韓退之作十琴
操李太白諸人作樂府諸篇皆承襲舊名撰造新語猶
屈原之九歌也太一天神也按天官書中宮有太一星

非此之謂禮記云禮本于太一莊子云主之以太一太一者天地之始也主宰之帝故曰上皇祠在楚東故曰東皇猶秦祠白帝于西時也司命亦天神也周禮所祀有司中司命註以為星非也司命者萬物之母也有大有少周禮一為司中一為司命中者民受中以生之中命者陰陽五行化生萬物之命也東君日神也禮云春朝朝日又云王宮祭日祀于東方故曰東君雲中君雲神也周禮祀風師雨師而不言祀雲雲師雨之屬也固

宜有祀或謂楚有雲夢二澤雲澤謂之雲中夢澤謂之
夢中雲中君雲澤之神考之歌辭曰日月齊光曰龍駕
帝服曰焱遠舉曰橫四海乃天雲非雲澤也湘君湘夫
人之稱黃陵廟碑楚辭辯證備矣太一尊神歌辭獨簡
質而莊重擇日辰盛服飾絜器物備音樂以致其尊奉
臣之修其忠善以事君猶是也司命雲日言神既來而
過去以况君始親已而後疏之于皇英欲一見而不可
得以况已欲見君納忠而卒不荅也河伯與巫既別而

波迎魚媵近于古者三有禮焉之遺風而楚之于原不
如是故集註有云原豈至是而始歎君恩之薄乎八篇
竝以神況君山鬼物魅耳不可以況君也故原特變上
八篇之例不作巫語而作鬼語言鬼欲親人而人不親
之以況已欲親君而君不親已也夫此歌假設之辭與
戲劇何異而唯恐引喻失當有乖尊卑之禮敬之至也
九歌之後有二篇國殤者為國死難之殤禮魂者以禮
善終之魂年十九以下死曰殤不終其天年而死亦曰

殤春蘭秋菊終古無絕四時祖考之常祭也前之九歌
原託以伸已意後之二篇無所託意止為巫者禮神之
辭而已蓋與九篇不同時後人從其類而附焉此畫李
伯時所作伯時畫妙一世而或傳此畫若有神助然蓋
其尤得意者予在洪都郡守毛侯出示予既為作解題
而復櫟括九篇歌辭成詩一篇與謌之意雖微不同而
明原之心其趨一也嗚呼千載而下能有契于原之心
者尚有味于予之言哉李家畫手入神品楚賢流風清

凜凜誰遣巫陽叫帝閭為招江上歸來魂音紛紛音紛
紛柱高辰遠聰不聞扶桑初瞰海橫雲二妃淚灑重華
墳司命播物泥在釣洪纖厚薄無齊勻公無渡公無渡
衝風起螭龍怒夜猿啾啾天欲雨天欲雨迷歸路歲晏
山中採蘭杜靈修顧顧復去莫怨瑤臺神女妬坎坎鼓
進芳醕恥作蠻巫小腰舞千年往事今如新摩挲舊畫
空愴神騰身輕舉一回首楚天萬里江湖春

書貢仲章文豪後

吳 激

理到氣昌意精辭達如星燦雲爛如風行水流文之上
也初不待倔强其言蹇澁其句怪僻其字隱晦其義而
後工且奇噫茲事微矣名于唐者二名于宋者五而已
亦惟艱哉仲章江南之英與吾鄧善之袁伯長俱掌撰
述于朝各能以文自見蔚乎其交蔭炳乎其爭輝予有
望焉予來京仲章將有上京之役示予新作數十溫然
粹然得典雅之體視求工好奇而卒不工不善者相去
萬萬也讀之竟喜之深書此而歸其褰夫上有所規下

有所違正有所本旁有所參韓柳氏自陳其所得甚悉
暇日善之伯長切磋究之又必有以起予也

書邢氏賢行

吳澂

晉散騎侍郎賀喬妻于氏養其夫仲兄賀羣之子率為
子乳哺鞠育同于已生使喬廣置側媵後有妾子曰纂
于亦子之今觀大同穆氏妻邢氏子夫兄之子與夫妾
之子恩勤備極二事適相類然于氏為士大夫之妻通
經史能文章咸和五年上表于朝援引古今辭義蔚然

以此婦人而有賢行固其宜也邢氏生長民間非有見聞之益數學之功也而其賢不減於于可不謂難能者哉嗚呼近世士大夫不能正身以御家縱其妻悍妬無道無子而不肯子兄弟之子鉗制其夫不令有妾阻隔其妾不令有子卒至絕嗣為不祀之鬼者吾見多矣聞邢氏之風獨不內愧于心乎夫婦人無非無儀豈欲善譽之間于人而君子樂稱邢氏之賢亦將愧夫世之不賢者也

跋盧龍趙氏族譜後

元明善

余嘗述元氏族譜四世以上不能原其所自每悲之及觀盧龍趙氏之譜繼繼承承的然可考蓋四百許年十有三世矣嗚呼是不徒偉人碩士豐功盛烈以永今垂亦肖子哲孫克衍其世世為之譜乃能是蕃且大也今夫天下之人孰非大姓之苗裔哉非大姓何以有氏于今惟其不幸而失其傳或昧者不知所述故有不能遠知其世而為之悲者余于是譜則然矣凡大夫士之讀

是者亦豈漠然而無所感哉故夫趙君之藏之也不但厚于其家而已也

題書學纂要後

袁 衷

余既粹集書法大略雖備而古人工拙則不在此因復思漢魏以降書雖不同大抵皆有分隸餘風故其體質高古及至三王始復大變右軍用筆內擲而收斂故森嚴而有法度大令用筆外拓而開廓故散朗而多姿貞觀以後書法清婉亦由接武六朝餘風未散至開元

以後乃務重濁李北海專事奇崛徐會稽全師禊序至
顏太師一變為方整規矩然平原畫贊乃展逸少者耳
下及沈柳各命新體至楊李而極逮至王著始追蹤永
師遠迹二王故世所傳淳化閣帖猶不失古人意度者
以出于著故也慶厯以來唯君謨特守法度眉山豫章
一掃故常米薛二蔡大出新奇雖皆有所祖襲而古風
蕩然南渡而後思陵大萃衆美筋骨過婉吳傳朋規倣
孫過庭姿媚傷妍近世姜堯章迴脫脂粉一洗塵俗有

如山人隱者難登廊廟蓋專工氣韻則有旁風急雨之失太守繩墨則貽叉手竝脚之譏大要探古人之玄微極前代之功巧乃為至妙夫古人所以窮極絕巧者以得真蹟臨摹也今去古既遠重經喪亂真蹟愈少閣帖數行價逾金玉窮鄉學士何由獲窺加以傳模之餘失真益甚今世師閣本者多尚肥美倣絳刻者率務奇勁苟記憶所遺本態呈露致使學者訛以承訛謬以襲謬殊不知前乎千百載之先崔蔡張鍾之徒復何所做像

而為之哉良以心融神會意達巧臻生變化于豪端起
形模于象外諸所具述咸有其由必如庖丁之目無全
牛由基之矢不虛發斯為盡美老子曰通乎一萬事畢
此之謂也雖然黃太史有言士大夫下筆須使有數萬
卷書氣象始無俗態不然一楷書吏耳初何足云小子
其尚識之

跋歐書皇甫誕碑本

袁 掄

渤海公以險勁易王體故碑石照耀四裔大小皆合宜

右軍世傳皆小楷霜寒帖稍展至筆陣圖則疑非真再傳為千文為廟堂碑確守繩墨稍廣拓非歐不能余嘗評歐書化度第一皇甫碑與溫恭公伯仲臨池積年必領其妙余幼不學書酷喜藏歷代金石覽此益重自棄之歎

書堂邑張令去思碑後

虞集

至大二年夏五月余受國子助教入京師舟過會通河會河間運司括行舟取鹽海中余亦為津吏訶止食于

逆旅之主人未具主人曰起公府有急速至者衆避長
席予之子更他席坐察來者意甚沮相顧曰張令在寧
有是哉予因問張令如何皆進曰官買物數月不予直
民寧不願待願歸治生而縣益亟追以來終不得直部
使者以責吏而又徵我曹今道路府史之費且十倍吾
安用得直為張令時官有徵買皆親載錢至市若鄉悉
召父老人家甲乙立告以縣官所須與物賈使自推擇
當賣所有者指名即受賈書牘期某日以某物詣某所

吏無所出入是以事集而民不知且令行縣中無忤視
民甚畏愛之市井婦稚無惡言強壯無狠鬪即有訟令
親詰諭往往悔悟去或有當問即攝牘置案上一不以
示吏手書當問者鄉里姓名縣門其人如約至亦知令
得實不煩鞫治即承罪謝去以為常縣始多無名人竄
迹吏舍中鈎民為訟使兩不得解因以持令佐伸縮為
已利至是無所得志皆自免歸田圃令去稍稍復來矣
既而予憇道傍大樹下有二三父老行且暘皆依樹坐

久之忽悵然曰客書生耶吾令張君亦書生也皆爭言
張令催科時告民曰民有戶小賦寡力不足自致府者
勿予鄉正里長其會諸令所三日小民悉自致所賦詣
令令總其戶之所出親至府上之而大家亦無後期者
今去為太子文學吾賦為鄉正里長徵去隨用之不以
入官期既迫官疏不入賦者逮治之我等奔走失業家
且破矣悲哉寧復有張令乎予顧從者曰小子識之是
吾友人濟南張希孟也明年見翰林直學士元復初為

堂邑人作張君去思碑因錄著其後云君自文學為監察御史遷翰林待制今為右司郎官

書王贊善家傳後

虞集

太子贊善王公受知世祖皇帝以正道經術輔翊裕祖有古師傅之誼裕宗嘗問歷代治亂公以遼金事近接耳目即為區別善惡而論著得失深切世用蓋二十萬言上之藏其草于家不以示人國史紀述亦未及訪求也觀其受命于世祖者誠非徒加貴名以為具臣者哉

世祖皇帝擇勲戚子弟學于公師道卓然及公從裕宗
撫軍稱海始以諸生屬許文正名臣自是多學而國學
之制興矣然世言國學者初不知肇始于公也世祖皇
帝將治厯頒正朔天下知公妙算術舉以命之公曰厯
法可知也非明厯理不足與共事即請留許公於既退
而授時厯成公曰今南北為厯學者總古今厯法四十
餘家是厯無愧矣然必每歲測驗修改然後不復有先
後時之弊而言厯者知守成式而已今四十餘年公之

微意莫或識之而遂謂公以陰陽名家尚得為知言也哉予竊好論次舊事常以為非職守不敢越為之獨思昔人之立志行事其情微略不見白于後世誠亦君子之所不忍者哉及得贊善公家傳于其孫植將約而志之會植赴高唐州判官行且有日故不暇為也姑為表其當著于世而時人不能共知道者

書玄玄贊藁後

虞集

人之于文也猶日月之有輝光山川之出雲雨草木之

有華實也時至氣應感遇于事物之動而發見焉無所容其私心也而以私心秉之者則糾纏蕪穢竒險僻陋狂妄之病有不可勝計者焉是故天下之文鮮矣夫唯常為于不得不為因其所當為而道之無一豪故為之意撓搶乎其間則天下之至文煥然著見不可掩矣而非知道不能也何也知道則無嬰兒女婦之見而有天下後世之慮矣以其有天下後世之慮也故不得已于言而言以其無嬰兒女婦之見也故時寓于言以自適

其性情一無累其容情浮氣之妄動古之人之名世者槩出于此而已矣而此其所存為何在也而謂有可媚嫉者非知文者也而况道乎集于所謂文者蓋嘗好而習之人或曰此為詞章者也于是不必言而強言之以相長于一日其自媿于中多矣且夫身之所處非深有交于物變之可愕者而又生當太平之盛從容優游于言語文字之間不亦可乎觀于玄玄贅豪而三歎焉玄玄贅豪者龍虎山高士吳君玄初所為詩文也玄初服

黃冠以自隱無所營于時故無所爭于人無所礙于物
交游天下之名士詩文往來皆一時之盛者其言溫而
肆清而容雜而不厭無所迫于憂患無所溺于宴安直
幾于道者之為乎蓋集聞之玄初嘗為雷空山先生學
先生臨川人集幼時嘗得其老子莊子說而讀之未盡
解也以請于吳幼清先生先生曰嘻非孺子所知也後
當知之後十餘年集來京師見今翰林待制袁公伯長
作空山墓銘而後歎曰嗟夫易老之相表裏久矣世之

知者或寡矣孰允蹈之而措諸辭以示人者乎今又十五年思空山之高致而不可見乃于玄初焉而見其傳緒之微矣不然玄初何以能若是也集于是深有傲焉故書而識之君子庶有以諒其心也夫

書王貞言事

虞集

至治癸亥八月七日夜半糾堅持穆爾特穆爾巴哈稱使扣北門入坐中書未明召集百官奪其印八日樞密院掾史王貞見其完顏副樞于都堂後西北廡下告之

曰大行晏駕丞相死中書樞密無至者二人實來糾堅
特穆爾者累朝退黜不用特穆爾巴哈者亦在散地誰
使之耶兵權所在印豈可以授人貞職在治文書爾然
臣子之分則均不敢不言副樞愀然歎曰大夫言是也
貞因以其說遍告樞府大臣及其幕府請急執二使與
中書同問治院官親與名將急行統山後軍擒賊使不
致有他變別遣官吏將兵民守關隘而遣使西出達今
上潛邸請早至大都庶幾宥密大臣之事不然則國未

可知而諸公之罪大矣聞者震栗是之而不敢發也聖
上既行天誅樞密院差貞從官長迎駕興和還至大都
中書召貞為丞相掾貞字吉甫保定唐縣人

史官曰義者天下之公也順逆之辨人心安有不同然
者哉知覺則同而臨事之際隱忍異懦卒無以克其明
而徇于患失以自陷于不義者志不足以命氣而制其
欲故也若貞之言其發于義者勇矣然人之立事立功
也則有時有位有才矣有其才而無其位有其位而無

其才皆不足以有成二者得矣又必當其時之可否焉
此事之所以難也觀貞之言才可知矣所論亦當其時
已而其位則不過得言之耳故備錄之以待採擇紀載
云

書經筵奏議藁後

虞集

泰定元年春皇帝始御經筵皆以國語所說書而進讀
左丞相專領之凡再進講而駕幸上都次北口以講臣
多高年召王結及集執經從行至察罕行宮又以講事

亟召中書平章張公珪遂皆給傳與李家奴等俱行是秋將還皆拜金紋對衣之賜獨遣人就賜趙公簡于浙省加白金馬賞言功也四年之間以宰執與者張公珪之後則中書右丞許公思敬與今趙公世延也御史臺則中丞薩題勒密實任潤譯講讀之事者翰林則承旨額森特穆爾呼嚕古圖嚕默色學士吳激幼清阿嚕威叔重曹元用子貞色徹肯伯瞻揚濟克信臣馬祖常伯庸及集待制彭寅亮允道吳律伯儀應奉許維則孝思也

集賢則大學士趙公簡敬甫學士王結儀伯鄧文原善
之也李嘉努德元買閭仲章皆禮部尚書吳秉道彥弘
中書叅議張起岩夢臣中書右司郎中也或先或後或
去或留或從或否或久或暫而集與揚濟克則四歲皆在
此行者也今大丞相自爰立後每講必與左丞相同侍
而張公既歸老猶帶知經筵事皆盛事也今年春趙集
賢始以建議召入侍講一日既進書待命殿廬趙集賢
慨然歎曰于是四年矣未聞一政事之行一議論之出

顧有取于經筵者將無虛文乎集乃言曰鄉者公奏熒
惑退舍事玉音若曰講官去歲嘗及此又欲方冊便觀
覽命西域工人搗楮為帙刻皮鏤金以護之凡廿枚專
屬燕赤繕錄前後所進書以此觀之簡在上心明矣誠
使少留淵衷則見于德業者何可得而名哉且先儒有
言政不足適人不與間其要格心而已然則所慮者言
不足以達聖賢之旨誠不足以感神明之通吾積吾誠
云耳他不敢知也然而集賢懇懇切至于孟子之所謂

夫恭敬者蓋可見焉故併書奏議藁後而歸之四年十二月朔旦書

題吳傅朋書及李唐山水

虞集

予幼過豫章見滕王閣榜吳公傅朋所題也裒回顧瞻歎其深穩端潤非近時怒張筋脉屈折生柴之態後聞宋阜陵欲易其九里松題至十數御筆墨而卒不能及因使塗字以金而署之當時固善人君之服善無我而亦深知吳公之書之真不可及也大抵宋人書自蔡君

謨以上猶有前代意其後坡谷出遂風靡從之而魏晉之法盡矣米元章薛紹彭黃長睿諸公方知古法而長睿所書不逮所言紹彭最佳而世遂不傳米氏父子書最盛行舉世學其奇怪不惟江南為然金朝有用其法者亦以善書得名而流弊南方特盛遂有于湖之險至于即之之惡謬極矣至元初士大夫多學顏書雖刻鵠不成尚可類鶩而宋末知張之謬者乃多尚歐率更書纖弱僅如編葦亦氣運使然耶自吳興趙公子昂出學

書者始知以晉名書然吾父執姚先生嘗云此吳興也而謂之晉可乎此言蓋深得之子比過吳越見傳朋書最多皆隨分贊歎且圖來者稍守正法云耳此卷又以李唐山水繼之亦好事者蓋書畫同一法耳後來畫者略無用筆故不足觀此畫乃直如書字正得古象形之意甚為可嘉因劉掾執卷求題為座客言如此悉書之云集時目疾在告以公牘與史館曰執筆唯憑于手熟為文每事于口占非飾辭也

跋蘇氏家藏雜帖

宋本

今人以行草名者多蘇伯修家藏雜帖一卷嘗試就卷中所有評之鮮于困學如雲間公子玉骨橫秋富貴風流仍復度世胡紹開如拙工鑄鼎模範未精沈重侏𦍻似奇實陋姚先生如上帝陰兵舉世不識恍惚變現要以氣勝盧疎齊如叢祠野屋繪畫風雷雖復駭人却非塵俗張大經如油翁獻技錢孔不濡運杓自然不過熟耳苟正甫如近郊田叟老不作業意度貞淳恨乏京樣

王參政如勤婦作鯁致力杼軸雖媿羅綺亦復遲壞周
景遠如頭陀學佛頗見小乘苦行繼修或可證果予既
品題七八人者或謂蕭叔達身能作字故鍾繇輩遭其
口吻子僅解操筆詎容歷詆殊不知食前方丈具于饗
人舉挾一嘗甘辛立辨正自不必手善烹調然後始識
味也

題郎中蘇公墓誌銘後

柳貫

自予遊京竊從廷臣知邊事者一二言和林城其地沃

衍河流左右灌輸宜雜植黍麥故時屯田遺迹及居人井臼往往而在蓋陰山大漠益南數千里控扼形勢此為雄要大德中邊廷嘗一擾矣亡幾天子為輟右丞相順德忠獻王出征其省事至則息兵勞農修置通貨財而先是王所遣留屯稱海帥臣張某亦以其田功來上未踰年士氣民情安全如初王薨而張亦遄死屯耕事即廢雖重臣踵接率蹈故常無復長慮後憂迨關陝變起倉猝馳潰卒數十百騎闔門來責軍實則上下顛踣

失措兵民相顧幾無所繫屬賴皇靈震烜尋自引去而
謫言屢驚猶越月踰時方大雪塞野饑人狼籍道上趙
郡蘇公時以左右司郎中始至即白發倉實計口予食
以哺之又下急符趣北境轉輸益募商人高估入粟充
其儲峙縫紉調齊窮智畢力一年而端緒見二年而品
式具滿三年而完庶樂遂人忘其艱郎御史行邊者還
言治狀朝廷輒加慰勉方以代往遲公歸用之而公之
精力已疲耗甫及京遂卒盖和林城國家始以宣慰使

治其處于後建省常選勲戚大臣以鎮重之至郎吏亦優秩假寵其勞効灼灼則或階之以踐樞要然十數年來道路間可指稱者不過自王以及于公豈非以其時之所遭而易為功歟予見當今藩府望僚持文墨議論以與其長相上下每軋于盛氣不得展布甚則挫辱詬罵出危語中傷之者皆是也以公敏裕肅給獨能謀行政施較著若是其所樹立有足動人矣使公幸當王時策邊防利害一一為王陳之必能精訓練備耕戰三二

年中計稱海之粟足支竝塞數歲之食然後揚聲以暢
天威將薄海以北無不嚮風訮服豈有黑子著面之足
慮哉得其人而或失其時天下之事皆若是而已予讀
公墓隧之碑而知其述作之意公所歷官其設施無一
不可書和林之事紀載獨詳此則史氏特書之例也夫
事以顯諸文文以實諸事虞君之為是辭固以公之制
行于古無戾其業盛則其言豐其理直則其法備不有
得于今必有得于後矣然予區區表而出之則以其不

盡用者為公悲而以其狃于宴安者為世戒因予言而興起于斯文今不敢必其無人焉耳



元文類卷三十九

欽定四庫全書

集部

元文類卷四十

詳校官通政使_臣夢吉

助教_臣常循覆勘

總校官庶吉士_臣朱銓

校對官中書_臣嵇承志

謄錄監生_臣李維瀛

欽定四庫全書

元文類卷四十

元 蘇天爵 編

雜著

經世大典序錄

趙世延等

欽惟欽天統聖至德誠功大文孝皇帝以上聖之資纂
承大統聰明睿知度越古今至讓之誠格于上下重登
大寶天命以凝于是闢延閣以端居守中心之至正慨
念祖宗之基業旁觀載籍之傳聞思輯典章之大成以

示治平之永則迺天曆二年冬有旨命奎章閣學士院與翰林國史院參酌唐宋會要之體會粹國朝故實之文作為成書賜名皇朝經世大典明年二月以國史自有著述命閣學士專率其屬而為之太師丞相達爾罕太平王臣雅克特穆爾總監其事翰林學士承旨大司徒臣阿琳特穆爾奎章閣大學士臣和塔拉都哩默色奎章閣大學士中書右丞臣薩題奎章閣大學士太禧宗禋使臣阿榮奎章閣承制學士僉樞密院事臣多拉竝

以耆舊近臣習于國典任提調焉中書左丞臣張友諒
御史中丞臣趙世安等以省臺之重表率百司簡牘具
來供給無匱至于執筆纂修則命奎章閣大學士中書
平章政事臣趙世延而貳以臣虞集與學士院藝文監
官屬分局修撰又命禮部尚書臣庫庫擇文學儒士三
十人給以筆札而繕寫之出內府之鈔以充用是年四
月十六日開局倣六典之制分天地春夏秋冬之別用
國史之例別置蒙古局于其上尊國事也其書悉取諸

有司之掌故而修飾潤色之通國語于爾雅去吏牘之繁辭上送者無不備書遺亡者不敢擅補于是定其篇目凡十篇曰君事四臣事六君臨天下名號最重作帝號第一祖宗勲業具在史策心之精微用言以宣詢諸故老求諸紀載得其一二於千萬作帝訓第二風動天下莫大于制誥作帝制第三大宗其本也藩服其文也作帝系第四皆君事也蒙古局治之設官用人共理天下治其事者宜錄其成故作治典第五疆理廣袤古昔

未有人民貢賦國用繫焉作賦典第六安上治民莫重
于禮朝廷郊廟損益可知作禮典第七肇基建業至于
混一告成有績垂遠有規作政典第八政刑之設以輔
禮樂仁厚為本明慎為要作憲典第九六官之職工居
一馬國財民力不可不慎作工典第十皆臣事也以至
順二年五月一日草具成書繕寫呈上臣集等皆以空
疎之學謬叨委屬之隆才識既凡見聞非廣或疎遠不
知于避忌或草茅不識于憂虞諒其具藁之誠實欲更

求是正疎略之罪所不敢逃竊觀唐會要創于蘇冕續于崔鉉至宋王溥而後成書宋會要始于王洙續于王珪至汪大猷虞允文二百年間三修三進竊惟祖宗之事業豈唐宋所可比方而國家萬萬年之基方源源而未已今之所述粗立其綱廼若國初之舊文以至四方之續報更加搜訪以待增修重惟纂述之初猷實出聖明之獨斷假之以歲月豐之以廩餉給之以官府之書勞之以諸司之宴禮意優渥聖謨孔彰而纂修臣僚貪

冒恩私不稱旨意不勝兢懼之至惟陛下矜而恕之謹序

帝號

臣聞我國家之有天下也上配邃古之聖神繼天立極非若後世之興者也堯以唐侯興虞夏禪殷周繇契稷起蓋有所因而進者也三代而下莫盛于漢唐宋漢起亭長則已微矣唐啟晉陽之謀宋因陳橋之變得國之故其亦未盡善者乎其餘紛然竊據一隅妄立名字以

相侵奪歷年不多者何足算哉惟我聖朝則不然聖祖
之生受命自天肇基朔土龍奮虎躍豪傑雲附歷艱難
而志愈厲處高遠而氣彌昌神明協符以聖繼聖至我
太祖皇帝而大命彰大號著大位正矣于是東征西伐
莫敢不庭大王小侯稽首奉命而聖子神孫德日以隆
業日以盛靈旗所向如草偃風至于世祖皇帝天經地
緯聖武神文無敵于天下矣試嘗論之金在中原加之
以天討一鼓而取之得九州之腹心宋寓江南責之以

失信數道而舉之致四海之混一若夫北庭回紇之部
白霄高麗之族吐蕃河西之疆天竺大理之境蠡屯蟻
聚俯伏內嚮何可勝數自古有國家者未若我朝之盛
大者矣蓋聞世祖皇帝初易大蒙古之號而為大元也
以為昔之有國者或以所起之地或因所受之封為不
足法也故謂之元焉元也者大也大不足以盡之而謂
之元者大之至也嗚呼制作若此所以啟萬萬年之基
詎不信歟成宗皇帝繼統于大成武宗皇帝恢宏于盛

業仁宗皇帝慈祥之政英宗皇帝神明之姿海內晏然
衆庶寧一晉邸信用姦謀違于祖訓天怒人怨遂終厥
身我今上皇帝應天順人義師克捷期月之間正位凝
命而又克讓明宗皇帝出于至誠凡屬有生莫不歡悅
重居大寶誕受尊號于是任賢輔治崇德報功體大臣
而理羣臣親九族而協黎庶人文備舉天道益彰頌聲
作于朝廷泰和決于荒裔治平之迹蓋有不勝其紀者
嗚呼今天下垂黃戴白之民年七八十至于百歲者皆

生于聖元有天下之日矣含哺鼓腹長子老孫至于世
世長戴聖元日月之照臨長樂聖元雨露之涵育何其
盛哉編年之書具載國史夫大天下之統一天下之心
莫重于號著帝號篇

帝訓

臣聞聖祖神宗之盛德大業著在簡冊昭如日星矣惟
聖心精微因言以宣者有不得而具聞焉采諸大臣故
家有因事而親蒙教誡或傳誦而得諸見聞及以文書

來上者悉輯而錄之以發其端後有可攷者得以次第而補之矣

帝制

臣聞古者典謨訓誥誓命之文或出于一時帝王之言或出于史臣之所修潤其來尚矣國朝以國語訓勅者曰聖旨史臣代言者曰詔書謹列著于篇

帝系

臣聞自三皇五帝以來莫不衆建同姓以作藩輔詩曰

本支百世蓋重之也國家宗系外廷無得而聞焉考諸
簡牘而可見者謹著之篇

帝系附錄

自古國家別本支樹藩屏以為國家長久之計然維持
之道蓋必有禮法存乎其間聖朝宗藩之蕃且大自古
莫及而累朝為之法制以保之者有分地人民賜予之
厚有車服官府符信封謚之貴有使命往來之禮有奉
命征討之事有訓勅防閑之禁事在簡牘可錄而傳者

次第歲月而著之篇

治典總叙

書曰冢宰掌邦治天子擇宰相宰相擇百執事此為治之本也故作治典其目則有官制沿革以見其名位品秩祿食之差有補吏入官之法以見用人之序附之以臣事者則居其官行其事其人其蹟之可述者也

制官

國家肇基朔方輔相之臣與凡百執事惟上所命其各

官皆因其事而命之方事征討重在軍旅之事故有萬戶千戶之目而治政刑則有斷事之官可謂簡要者矣既取中原定四方豪傑之來歸者或因其舊而命官若行省領省大元帥副元帥之屬者也或以上旨命之或諸王大臣總兵政者承制以命之若郡縣兵民賦稅之事外諸侯亦得自辟用蓋隨事創立未有定制世祖皇帝建元中統以來始采取故老諸儒之言考求前代之典立朝廷而建官府輔相者曰中書省本兵者曰樞密

欽定四庫全書

元文類
卷四十

八

院主彈糾者曰御史臺以次建置內外百司庶府各因其事而舉矣其在內者廢置陞降之因革政治之所繫也故不得不備考而紀之若夫宗戚之重莫重于宗正府今宗正所隸特重于姦盜詐偽之刑稼穡之本莫重于司農今勸樹藝者歲受其成目宣政總佛事而西域邊事之重係焉至于內廷東宮之官屬若國史翰林集賢之治文書宣徽之治玉食將作之治營繕若此之類皆以重臣領之蓋國家盛大庶事浩繁其職掌之事視

古昔幾至倍蓰故其官府之陞至于重大而其屬亦已繁多日益月增其勢然也其後頗以官冗吏繁為言數有詔裁減而卒未遑及亦有不得已者夫外之郡縣其朝廷遠者則鎮之以行中書省郡縣又遠于省若有邊徼之事者則置宣慰司以達之鹽鐵之類又別置官有軍旅之事分布於外者則置萬方府有大征討則置行樞密院無則廢舉刺之事則有行御史臺領監察御史肅政廉訪司以治之此其大凡也其詳各著于篇

三公

古者三公官不必備惟其人其職則寅亮天地燮理陰陽以論道經邦者也我國家以太師太傅太保為三公自穆呼哩國王始為太師凡為三公者皆國之重臣而漢人惟劉秉忠為太保其後鮮有聞惟贈官或有之又有所謂大司徒司徒太尉司空之屬或置或否其置者或開府或不開府而東宮嘗置三師三少不恒有也又有所謂開府儀同三司儀同三司者因金舊制謂之散

官實無開府之儀云凡開府者則有參軍長史之屬附見于篇

宰臣年表

宰相者上承天子下統百司以治民庶治體之得失國勢之安否繫焉國初將相大臣年月疏闊簡牘未詳者則闕之中統建元以來執政之官其拜罷歲月之可考列表而書之政事因可得而見矣

各行省

國初分任軍民之事或稱行省無定制既立都省車駕行幸都省官從而留都者亦謂之行省有征伐之事則或置行省與行樞密院迭為廢置中統至元間始分立行中書省有尚書省則為行尚書省尚書廢則行省仍稱中書初以行省為稱者雖有便宜承制之權而無職名留都所謂行中書省者不別設官因都省之留者而已其各處立行中書省因事設官官不必備皆以省官出領其事或才置參政僉省同僉之類其後至于設丞

相其官皆以宰執行某處省事繫銜既而嫌于外重改
為某處行中書省平章若右丞左丞參政而其體始不
與都省侔矣參政之下又嘗再置僉省後亦廢今天下
行省凡十而有廢置遷革者著于篇

入官

天子擇宰相宰相擇百官治天下之要用人而已建官
之法有天下者之所慎也我國家之初任人惟其材能
卒獲豪傑之用及得中原損益古今之制度而行之而

用人之途不一親近莫若禁衛之臣所謂怯薛者然而任使有親疎職事有繁易歷時有久近門第有貴賤材器有大小故其得官也或大而宰輔或小而冗散不可齊也國人之備宿衛者浸長其屬則以自貴不以外官為達方天下未定軍旅方興介冑之士莫先焉故攻取有功之士皆世有其軍而官之事在樞府不統于吏部惟簿書期會金穀營造之事供給應對惟習于刀筆者為適用於當時故自宰相百執事皆由此起而一時號

稱人才者亦出于其間而政治繫之矣擇吏之初頗由
于儒而所謂儒者姑貴其名而存之爾其自學校為教
官顯達者蓋鮮獨國學初以貴近就學而用之無常制
其後歲有貢法而寢失初意矣其以文學見用于朝廷
則時有尊異者不皆然也至元以來數欲以科舉取進
士議輒中止延祐始力置進士科三年一取不及百人
爾世祖皇帝置國字以通語言其用人略如儒學之制
而加達矣至于奉上官之任使奔走服役歲月既久亦

皆得官雖細大有殊要皆為正流矣乃宗王之有分地
官府而保任之者與夫治酒漿飲食者執樂伎者為弓
矢衣甲車廬者治歷數陰陽醫藥者出納財賦者遠夷
掌其部落者或身終其官或世守其業不得遷他官而
有恩幸遭遇驟至貴近者有之非有司所得制而陳言
獻策納粟捕盜與勳舊之後裔權要之引進皆有其人
焉而不常也凡入官之途大槩如此云

補吏

國朝入官之制自吏業進者為多卿相守令于此焉出故補吏之法尤為詳密令別而錄之雖有舊例也衝改者簡牘尚存則亦存之以備沿革之考譯史宣使通事知印奏差附見

儒學教官

世祖皇帝既立國子學以教國人及公卿大夫之子取其賢能俊秀而用之又推其法于天下而郡縣皆立學其師儒之命于朝廷者曰儒學教授路府上州則置焉

蒙古字行則置蒙古字教授考滿皆入流而陰陽醫學亦倣置教授不與流選之考

軍官

武臣之入官也其始以功其子孫以世繼茲著其大槩詳在軍旅之典矣

錢穀官

國家既有中原國用所繫賦稅為重而內附諸侯之取諸民者寬急愛約各唯其意莫能一也世祖皇帝始制

宣課官多擇明敏忠厚之士用之民用稍舒方是時郡縣之間唯利權為要官及好聚斂者見用紛然建置官府民用弗堪今數十年之間稍有定制故凡錢穀之任有可考者則備書之以見其沿革云

投下

古者諸侯分國而治天子命卿之外大夫士以下其君皆得而命之今制郡縣之官皆受命于朝廷惟諸王邑司與其所受賜湯沐之地得自舉人然必以名聞諸朝

廷而後授職不得通于他官蓋慎之也

封贈

至元中追贈之制惟一二勲舊之家以特恩見褒雖略有成例未行也至大初始行定制課忠責孝之意備矣其沿革著于篇

承廕

聖王之制賞延于世是以國家有承廕之法辨嫡庶謹嗣續推恩致儆之法意備焉

臣事

維我祖宗聖德神功至盛極大如天地之不可計度如日月之不可繪畫聖上詔修此書實以顯謨承烈為重然求事蹟于吏牘則文繁者不足以得其旨意事簡者又不足以見其始末于是神聖思慮之精微誥訓之詳委攻取之機略法令之制作幾不得其什一焉以為宗藩大臣中外文武百僚有近侍帷幄遠將使旨內議典則外授征討或各有所授而傳焉因得以考其續餘之

所在故從而求之期月之間其以書來告者既取其大
係諸聖典而其事有不可棄遺者著臣事之篇

賦典總序

傳曰有德此有人有人此有土有土此有財有財此有
用茲古今不易之論也粵若皇元肇基朔方神功大業
混一華夏好生之仁如天地無不覆載此聖德之昭著
也今賦典之目有曰版籍戶口八紘萬國文軌攸同總
總林林重譯歸化此有人也曰都邑曰經理始自建邦

設都分疆畫界置郡邑以聚烝民經田野以均稅役次而大封同姓以厚親親之義此有土也曰農桑曰賦稅曰鈔法曰海運曰金銀珠玉曰銅鐵鉛錫曰鹽法曰茶法曰酒課曰商稅曰市舶均其貢賦遷其有無穀貨流通富民利國此有財也曰宗親歲賜曰百官俸秩曰公用錢曰常平義倉曰惠民藥局曰市糴糴草曰賑糶賑貨曰恤惠鰥寡歲有經費制之以節出納稽會有司具焉此有用也於呼我祖宗創業守成艱難勤儉亦豈易

言哉大率以修德為立國之基以養民為生財之本布諸方策昭示後裔以垂憲萬世者寧有既乎

都邑

惟我太祖皇帝開創中土而大業既定世祖皇帝削平江南而大統始一輿地之廣古所未有遂分天下為十一省以山東西河北之地為腹裏隸都省餘則行中書省治之下則以宣慰司轄路路轄府州若縣星羅碁布粲然有條至元間嘗命秘書少監虞應龍等修大一統

志書在官府可考焉若夫地名沿革之有異城邑建置之不常歸附之期設官之所皆必有徵所以紀疆理之大彰王化之遠也猗歟大哉

附錄 安南

我國家始定雲南即出師取安南事見征伐篇及其來朝事見朝貢遣使等篇今黎蒯所撰安南志略沿革地理山川物產風俗略備取以著此篇其封爵有王侯官稱有御史輿服法令之類僭擬于天朝朝廷寬仁待以

遠人而閼略之而不可載于此故不書

版籍

洪惟我太祖皇帝龍飛朔方開天建極以生民為心繼
惟太宗皇帝纂承天緒迨歲甲午減金于蔡明年乙未
始下詔籍民數時方兵革之餘自燕京順天等三十餘
路得戶八十餘萬屢勅撫民之官勞來安集增羨者賞
逃亡者罰歲壬子欲驗戶口登耗復下詔籍之視乙未
之數增二十餘萬戶欽惟世祖皇帝其仁如天世治時

雍黎民丕變至元七年有司請大比民數復增三十餘萬戶十一年上命丞相巴延伐宋諭之曰昔曹彬不嗜殺人一舉而江南克汝其體朕心法彬事毋使吾赤子橫罹鋒刃聖人如天之仁于茲見矣迨南北混一越十有五年再新亡宋版籍又得一千一百八十四萬八千六百餘戶南北之戶總書于冊者計一千三百一十九萬六千二百有六口五千八百八十三萬四千七百一十有一而其山澤溪洞之氓又不與馬上視漢唐極盛之數

無以加此夫天地之道生生不息推之以祖宗厚澤深仁洪昌繁衍聿有以隆我皇元萬世無疆之丕基

經理

履畝而稅者亦田制之一法也故有國家者必善治之則人不擾而賦有恒否則未見其利也夫民間强者田多而稅少弱者產去而稅存固在所當治也延祐初章閭倡經理之議期限猝迫貪刻竝用官府震動人不聊生富民黠吏竝緣為姦盜賊竝起田萊荒蕪其弊有甚

于在前者至降明詔以撫慰之而後定故才臣計吏之有欲為者可不熟慮而慎行之哉

農桑

農桑者王政之本也可不重哉我世祖皇帝從左丞張文謙之請立司農官頒農政化天下以敦本就實之道老者得其所養少者有以自力教之蓄積之方申之學校之義牧民之官法其勤惰風紀之司嚴其體察歲終以為殿最其法可謂至矣迨夫列聖相承綸音誕布必

諄諄以勸農為言皆所以為生民之命而開太平之基者也今悉著于篇

賦稅
稅糧

太宗皇帝詔有曰依倣唐租庸調之法其地稅量土地之宜大朝開創之始務從寬大此丙申歲詔旨之節文也世祖皇帝至元十七年申明舊制而加密焉則送納之期收受之式封完之禁會計之法于是乎大備矣

賦稅
夏稅

成宗皇帝時丞相諤魯等以江南科稅之未有定例也
于是參稽亡宋之制定夏秋二稅則輸以木綿布絹絲
綿等物秋止徵其糧稅視其糧以為差或一石輸稅三
貫二貫一貫或一貫五百文一貫七百文因其地利之
宜人民之衆酌其中數而取之蓋經久之道也然稅隨
地出有產去而稅存者貧弱或不給焉守土之吏可不
體其立法之意也哉

賦稅 稅差

國家之得中原也科差之名有二曰絲料曰包銀各驗其戶而上下科取之中統建元以來始有定制歲終中書則會計其出入總數而奏焉年穀不登則有減免之恩所以息民力也及得江南其制益廣國家殷富人物阜康則王者輕徭薄賦之効焉

海運

惟我世祖皇帝至元十二年既平宋始運江南糧以河運弗便至元十九年用丞相巴延言初通海道漕運抵

直沽以達京城立運糧萬戶府三以南人朱清張瑄羅
壁為之初歲運四萬餘石後累增及二百萬石今增至
三百餘萬石春夏分二運至舟行風信有時自浙西不
旬日而達于京師內外官府大小吏士至于細民無不
仰給于此於戲世祖之德淮安王之功逮今五十餘年
裕民之澤曷窮極焉

鈔法

世祖皇帝中統元年七月創造通行交鈔以絲為本以

革諸路行用鈔法之弊也行用鈔之法文牘莫稽交鈔則以銀五十兩易絲鈔一千兩是年十月又印造諸路通行中統元寶每一貫同交鈔一兩兩貫同白銀一兩又以文綾織為中統銀貨每一兩同白銀一兩而銀貨未及行焉印造支發歲有經數用久而弊者則赴官換易除以工墨稱物貨之平通貿易之便為利博矣其法之弊也鈔輕而物重子母不能相權故至元尚書省折以中統之五倍至大尚書省又折以至元之五倍每加

愈重而中統至元之相兼迄于今而見用其可稽者皆錄焉

附錄 錢法

周禮九府圜法其來尚矣聖朝造交鈔寶鈔以權錢鈔有錢文銅有禁法是世祖皇帝有意于圜法久矣特未遑鼓鑄流通耳至大三年詔有司行用銅錢四年詔罷之錢雖不行而議者甚衆間有論辯確至隨章具錄以備舉行雖然資世之寶廢興亦有數存乎其間云

金銀珠玉銅鐵鉛錫礬鹽竹木等課

山林川澤之產皆天地自然之利也可以富國而或以病民我國家皆因土人呈獻願輸之課其多者不盡收其少者不强取故享其利于莫窮焉凡州郡所入之數登於王府為國經賦者則載之而好功興利之徒時立說以自售其事之虛實言之用否則在朝廷也

鹽法

國初以酒醋鹽稅河泊金銀鐵冶取課于民歲定白銀

萬定六色均辦之太宗皇帝歲庚寅始行鹽法立河間山東平陽四川課稅所四每鹽一引須重四百斤其價銀一十兩世祖皇帝中統二年減銀為七兩至元十三年既取宋立兩淮兩浙福建運司三每引改中統鈔九貫二十六年增為五十貫凡天下總設運司七分辦歲課然難易各不同有因自凝結而取者解池之課鹽也有煮海而後成者河間山東兩淮兩浙福建之末鹽也惟四川之鹽出于井深者數百尺汲水煮之井亦多不

同往往在萬山之中解鹽之外工力勞費竈戶凋弊調額漸增本末均困因此其難者也元貞丙申每引增課鈔為六十五貫至大己酉至延祐乙卯七年之間累增為一百五十貫泰定乙丑減去二十五貫天曆己巳復增為一百五十貫凡今天下歲辦正餘鹽以引計者二百五十六萬四千有奇以課鈔計者歲入之數七百六十六萬一千餘定噫視中統至元之數已增幾二十倍矣然而國用益不給何哉司財用者不可不察也

茶法

皇朝至元五年始以興元交鈔同知運使白賡言初推成都茶課十三年江南平左丞呂文煥首以主茶稅為言以宋會五十貫準中統鈔一貫次年定長引短引是歲征一千二百餘定十七年置推茶都轉運使司于江州路總江淮荆湖福廣之稅而遂除長引專用短引二十一年免食茶稅以益正稅二十三年以李起南言增引稅為五貫二十六年丞相僧格增為一十貫延祐五

年用江西茶運副法呼嚕丹言減引添錢每引再增為一十二兩五錢次年課額遂增為二十八萬九千二百餘定逮天曆己巳罷運司而歸諸州縣按茶之權始于唐德宗宋遂為國賦額今國家茶課由約而博原委有自云

酒課

國初有徵收課稅所而州縣酒醋悉隸後大都則立酒課提舉司外而路府州縣皆著課額為國賦之一其利

亦云厚矣

商稅

國家始得中原賦諸民者未有定制歲甲午始立徵收課稅所以徵商賈之稅初無定額至元七年立法始以三十分取一每歲隨路通收稅課以銀四萬五千定為額禁毋多取以紓民力逮二十六年僧格為丞相遂重增其稅自是以來漸以增益視其初倍蓰十百不侔矣

市舶

皇朝平定江南幅員既廣貢賦益夥于是泉州上海澈浦温州慶元廣東杭州鄰海諸郡與遠夷蕃民往復互易舶貨因宋制細物十分而取一麤物十五分而取一以市舶官主之其發舶其回帆必著其所至之地驗其所博之物給以公文為之期日而所入之貨嘗以萬計其法至詳密矣或者以損中國無用之貨易遠方難制之物為說而不異夫國家聲教綏懷無遠不及之效孰謂知所當寶者哉

宗親歲賜

國朝諸宗戚勳臣食采分地凡路府州縣得薦其私人
以為監秩祿受命如王官而不得以歲月通選調其賦
則每五戶出絲一斤不得私徵之皆輸諸有司之府視
所當得之數而給予之其歲賜則銀幣各有差始定于
太宗之時而增于憲宗之日其文牘可稽也至世祖平
定江南各益以民戶時料差未定皆折支以鈔而成廟
復加賜焉於戲大統有宗而事權不紊分支有則而恩

澤不遺規模宏遠哉

俸秩

國初在官未置祿秩至世祖皇帝中統建元始著給祿之令內而朝臣百司外而路府州縣微而府史胥徒莫不有祿大德中以外有司之有職田也故益之以米馬朝廷之歲費重矣而官吏之奉職者可不思所以報稱之哉

公用錢

在官者月給廩祿亦既周矣而隨朝諸大夫多貴官時有賀上燕集交好之禮取俸給以備用則吏屬多不給迺賜之錢使得貸諸人入其子息以給其用自至大二年始賜左右司六部後諸司援例以請者皆頒賜焉多寡無定制云

常平義倉

國朝自至元六年詔立義倉于鄉社又置常平倉于路府使饑不損民豐不傷農粟直不低昂而民無菜色誠

救荒之良法也今名雖存而實廢焉申明舉行則在乎人耳

惠民藥局

聖朝自太宗皇帝九年丁酉始立惠民藥局自燕京至南京凡一十路逮大德三年詔各路分置之官給鈔本各有差月營子錢修備藥物仍擇良醫主典救療貧民俾無疾痛之患大哉列聖大德好生之心無所不用其極

市糴糧草

夫食者民之所急故八政以食為先況邊庭所需軍儲尤不可一日闕者自中統二年省臣奉旨命戶部發鈔或鹽引令有司增其市直于上都北京西京等處募客旅和糴糧以供軍需以待歉年歲以為常又在京飼馬之芻惟用河間鹽今有司以五月預給京畿郡縣之民至秋成各驗鹽數以輸之名曰鹽折草每鹽二斤折草一束須重一十斤計歲用草八百萬束折鹽四萬引此

國家市糴之大略也

蠲免

恩免差稅

古者府藏有積乃與民休息或復其租我朝治底隆平時因慶遇或行幸所過恒賜差稅由是密邇如大興開平興和畿內諸縣賦稅屢免垂白之老不識公吏熙熙陶陶咸樂太平之世吁亦盛矣

蠲免

災傷免差稅

民者國之本賦者民之力我國家常以薄稅斂寬督責

思與民同樂乎雍熙故于耕也勸其惰勞其勤惟恐民之不足或有災沴詔書迭下除其賦稅以優民力俾無流移之患曰徯有年皆吾皇之賜也

賑貸

京師賑糶
糧紅帖糧

京師乃天下之都會人物繁輳逐末者多仰給海運糧至元二十二年兩城設鋪分遣官吏下其市直賑糶歲以為常間為豪強嗜利之徒巧取弗能周及貧民大德五年省臣奏旨令有司取會兩城貧乏戶口之數置立

半印號簿文帖各書其姓名口數逐月對帖以給之其視賑糶之價三分常減去其一名曰紅帖糧遂與賑糶並行焉

賑貸

各處災傷賑濟

周禮救荒之政十有二凶荒凶札皆有蓄積以備不虞漢高就食之令文帝發倉之政亦其次也我國家每下詔必以鰥寡孤獨不能自存為念特加優卹官為廩贍或不幸而遇水旱蟲螟之災即遣使存問安撫戒飭官

吏廩粟庫幣不吝其出凡在民者閉糴者罪出粟者官
視之如赤子惟恐有凍餒焉斯民何其幸也



元文類卷四十